

Na osnovu člana 14. Zakona o udruženjima i fondacijama (“Službene novine Federacije Bosne i Hercegovine” broj 45/02), Skupština Udruženja “Asocijacija studenata Fakulteta za javnu upravu u Sarajevu” na sjednici održanoj 11.04.2011. godine donijela je:

## S T A T U T

### Udruženja “Asocijacija studenata Fakulteta za javnu upravu u Sarajevu”

#### **I OSNOVNE ODREDBE**

##### Član 1.

Ovim Statutom regulišu se odredbe o nazivu, sjedištu i području djelovanja Udruženja “Asocijacija studenata Fakulteta za javnu upravu u Sarajevu” (u daljem tekstu Udruženje), o ciljevima te djelatnostima kojima se ostvaruju ciljevi, o informisanju javnosti rada Udruženja, o članstvu, pravima, obavezama i odgovornosti članova, o unutrašnjoj organizaciji, o tijelima Udruženja, njihovom sastavu, ovlastima, načinu odlučivanja, uslovima i načinu izbora i opoziva, trajanju mandata te odgovornosti članova, imovini i raspolaganju s mogućom dobiti, načinu nabavljanja imovine, prestanku te postupku s imovinom u slučaju prestanka postojanja Udruženja.

##### Član 2.

Udruženje “Asocijacija studenata Fakulteta za javnu upravu u Sarajevu” je nevladina, dobrovoljna, vanstranačka organizacija udruženih studenata Fakulteta za javnu upravu u Sarajevu.

##### Član 3.

Puni naziv Udruženja je: “Asocijacija studenata Fakulteta za javnu upravu u Sarajevu”.  
Skraćeni naziv Udruženja je: ”ASFJU”.

##### Član 4.

Udruženje zastupa interese svih studenata na Fakultetu za javnu upravu u Sarajevu.

##### Član 5.

Udruženje ima svojstvo pravnog lica.

##### Član 6.

Udruženje zastupa i predstavlja predsjednik Udruženjakojem je mandat jedne godine sa mogućnošću jednog reizbora.

##### Član 7.

Sjedište Udruženja je na Fakultetu za javnu upravu u Sarajevu, ulica Patriotske lige 41.  
Područje djelovanja Udruženja je Kanton Sarajevo.

##### Član 8.

Udruženje može saradivati sa kantonalnim, entitetskim, federalnim ili državnim udruženjima, te međunarodnim organizacijama koje djeluju u i van Bosne i Hercegovine.

Pregovore i ostale neophodne procesne radnje izvršava Upravni odbor Udruženja, koji je dužan da o tome obavijesti Skupštinu Udruženja na prvom skupštinskom zasjedanju. Upravni odbor Udruženja (u daljem tekstu Upravni odbor) isto tako može odlučiti da Udruženje istupi iz članstva organizacije (udruženja) u koje je predhodno ušla i o tome obavještava Skupštinu Udruženja na prvom zasjedanju.

## **II ZNAK I PEČAT**

### **Član 9.**

Znak Udruženja predstavlja pravougaonik koji je horizontalnom linijom podijeljen na dva pravougaonika različite veličine-manji gornji pravougaonik, u kojem je ispisan skraćeni naziv Asocijacije "ASFJU", te veći donji pravougaonik, koji je presječen dijagonalom od gornjeg lijevog do donjeg desnog ugla pravougaonika.

### **Član 10.**

Pečat Udruženja je okruglog oblika prečnika 30 mm u kojem je uz unutrašnji obod kruga upisano "Asocijacija studenata Fakulteta za javnu upravu u Sarajevu" na latinici (bosanski jezik) , a u sredini se nalazi znak Udruženja.

Način, upotreba i čuvanje pečata utvrđuje se posebnim aktom.

## **III CILJEVI I DJELATNOSTI**

### **Član 11.**

Programski ciljevi i djelatnosti Udruženja:

#### **CILJEVI:**

- Poštovanje prava čovjeka i građana zagarantovanih međunarodnim sporazumima;
- Kontinuirano brine o statusnim pitanjima studenata u vezi sa studijem;
- Vodi računa o kulturno – sportskim i drugim aktivnostima studenata;
- Brine o studentskom standardu i pravima studenata;
- Afirmacija moralnih, naučnih, kulturnih i intelektualnih vrijednosti bosanskohercegovačkog društva i na tim vrijednostima, kao i na civilizacijskim tokovima, razvoj svestrane ljudske ličnosti;
- Uključivanje studenata u evropske i svjetske tokove života, prevazilazeći geografske i političke regionalizacije i ograničenja, kao i uključivanja studenata u sve tokove obnove i razvoja Bosne i Hercegovine;
- Zalaganje za slobodu naučnog, nastavnog i obrazovnog procesa Fakulteta za javnu upravu i Univerziteta, te otvorenog dijaloga sa društvom;
- Uvođenje studenata kroz obrazovni proces u naučne i stručne projekte od značaja za Bosnu i Hercegovinu, evropsku i svjetsku zajednicu;
- Uspostavljanje međunarodne saradnje na naučno-stručnom, kulturno-zabavnom i sportskom nivou;
- Razvijanje ferijalne prakse u zemlji i inostranstvu, za potrebe studenata, zasnovane na naučno-stručnim programima Fakulteta za javnu upravu i Univerziteta.

#### DJELATNOSTI:

- Zastupanje i prezentovanje prava i interesa studenata pred organima i tijelima Fakulteta za javnu upravu u Sarajevu, Univerziteta u Sarajevu i državnih institucija, kantonalnih, federalnih i državnih vlasti Bosne i Hercegovine;
- Organizovanje tribina, javnih rasprava, seminara, konferencija i drugih kulturnih i obrazovnih manifestacija, kao i drugih aktivnosti i poslova značajnih za članove Udruženja;
- Permanentne aktivnosti na ostvarivanju optimalnih uslova socijalno-zdravstvenog i materijalnog obezbjeđenja studenata, kao i stvaranje uslova za uključivanje diplomiranih studenata u proces rada;

Udruženje može u okviru svojih djelatnosti i programskih ciljeva osnovati subjekt za privredne i druge djelatnosti, pod uslovima određenim zakonom.

#### Član 12.

Djelatnosti Udruženja se mogu ostvariti kroz:

- sekcije,
- sektore,
- godine studija.

Ovi oblici djelovanja se organizuju na akcionom principu.

#### Član 13.

Načela djelatnosti Udruženja su: poštovanje različitosti stavova, misli i ideja, sloboda izbora, samostalnost organizacije u radu, javnost i demokratičnost mišljenja te odgovornost pojedinca i organizacije za rad.

### **IV PRAVA I DUŽNOSTI ČLANOVA UDRUŽENJA**

#### Član 14.

1. Članom Udruženja postaje svaki student (bez obzira na status studiranja redovan, vanredan) samim upisom na Fakultet za javnu upravu u Sarajevu.
2. Počasni članovi Udruženja mogu postati studenti i nastavnici srodnih disciplina iz zemlje i inostranstva koji svojim radom, djelatnošću i materijalno-tehničkom pomoći doprinose ostvarenju programskih ciljeva i zadataka Udruženja.
3. Počasne članove Udruženja bira Upravni odbor o čemu obavještava Skupštinu Udruženja (u daljem tekstu Skupštinu).
4. Počasni članovi nemaju pravo odlučivanja u Udruženju.

#### Član 15.

Prava i dužnosti članova Udruženja su:

1. da aktivno učestvuju u radu Udruženja,
2. da se zalažu za poboljšanje standarda studenata,

3. da se angažuju u organima Udruženja, daju svoje mišljenje, prijedloge i preuzimaju neposrednu odgovornost za njihovo realizovanje,
4. u slučaju eventualnih bespravnih radnji koje nisu u skladu sa Statutom ili programom i ciljevima rada Udruženja, imaju pravo pokrenuti disciplinski postupak.

## **V ORGANI UPRAVLJANJA UDRUŽENJA**

### **Član 16.**

Organi Udruženja su:

1. Skupština Udruženja
2. Upravni odbor Udruženja
3. Predsjednik Udruženja

## **VI SKUPŠTINA**

### **Član 17.**

Skupština je najviši organ Udruženja.

Skupština se sastaje u redovnim i vanrednim zasjedanjima. Redovna zasjedanja Skupštine se održavaju jednom godišnje (početkom oktobra mjeseca) i ona su izborna-izvještajna.

Vanredna skupština zakazuje se po potrebi i na zahtjev:

1. Upravnog odbora
2. 1/3(jedna trećine) članova Skupštine.

Predlagač je dužan sačiniti radni materijal za Skupštinu.

Kvorum Skupštine čini 21 član Udruženja.

Od dana zakazivanja Skupštine do njenog održanja mora proteći najmanje 7 (sedam) dana.

Odluke se donose 2/3 (dvotrećinskom) većinom glasova, osim kod izbora predsjednika Udruženja.

### **Član 18.**

Skupštinu čine svi članovi Udruženja.

Skupština kao najveći organ Udruženja razmatra i odlučuje:

- o programu i planu rada Udruženja,
- donosi Statut druga normativna akta, njihove izmjene i dopune,
- o finansijskom planu i završenom računu za tekuću godinu,
- o jedinstvenim kriterijima za izbor članova Upravnog odbora, kao i o drugim poslovima i zadacima Udruženja,
- vodi računa o očuvanju identiteta Udruženja u skladu sa programskim dokumentima,
- bira i razrješava predsjednika Skupštine, Upravni odbor, Predsjednika Udruženja,
- donosi odluku o prestanku rada Udruženja.

### **Član 19.**

Skupštinom predsjedava Predsjednik Skupštine, koji se bira na period od 1 (jedne) godine, s pravom 1 (jednog) reizbora.

## **VII UPRAVNI ODBOR**

### **Član 20.**

Upravni odbor je izvršni organ Udruženja.

Upravni odbor broji 7 (sedam) članova i njihov mandat je 1 (jedna) godina sa mogućnošću jednog (jednog) reizbora.

Upravnim odborom predsjedava Predsjednik Udruženja a mijenja ga potpredsjednik Udruženja.

Upravni odbor održava sjednice po potrebi, a najmanje jednom u 2 (dva) mjeseca.

Kvorum za rad Upravnog odbora čini 5 (pet) članova Upravnog odbora, a odluke se donose nadpolovičnom većinom glasova prisutnih članova.

### **Član 21.**

Dužnosti Upravnog odbora su:

- Priprema i saziva Skupštinu Udruženja;
- Vodi cjelokupnu aktivnost Udruženja između dva zasjedanja Skupštine;
- Predlaže finansijski plan i izvršni račun i daje Skupštini na razmatranje;
- Provodi politiku, zaključke i druge odluke koje je donijela Skupština;
- Odlučuje o načinu saradnje sa drugim organizacijama (udruženjima).

### **Član 22.**

U slučaju prestanka aktivnosti jednog djela članova Upravnog odbora (u slučaju nedolaženja ili isključenja), Upravni odbor Udruženja između dvije sjednice skupštine može u sastav kooptirati 1/3 (jednu trećinu) članova.

Na prvom sjednici Skupštine Udruženja, Upravni odbor će o tome podnijeti izvještaj.

### **Član 23.**

Upravni odbor svoju aktivnost obavlja po sektorima djelatnosti:

- Nastava, naučni rad i režim studija;
- Standard i prava studenata;
- Kulturne - sportske djelatnosti i drugo;
- Međunarodna saradnja i
- Marketing i odnosi sa javnošću.

Upravni odbor može svoju djelatnost proširiti na dodatne sektore o čemu izvještava Skupštinu na prvom zasjedanju.

### **Član 24.**

Za ostvarivanje svojih funkcija Upravni odbor formira stalne i povremene komisije. Poslovníkom o radu Upravnog odbora utvrđuju se komisije, sastav, broj i način rada.

## **VIII PREDsjedNIK UDRUŽENJA**

### **Član 25.**

Predsjednika Udruženja bira Skupština neposrednim izborima, sistemom balotaže.

Kandidat koji dobije nadpolovičnu većinu glasova prisutnih članova Skupštine postaje predsjednikom Udruženja.

Mandat predsjednika Udruženja je 1 (jedna) godina, sa mogućnošću 1 (jednog) reizbora, a mandat prestaje istekom, ostavkom ili smjenom.

#### Član 26.

Predsjednik Udruženja predstavlja Udruženje, u skladu sa članom 6. ovog Statuta, kako na Fakultetu tako i van Fakulteta.

Predsjednik Udruženja je i ujedno i predsjedavajući Upravnog odbora.

Ovlaštenja Predsjednika Udruženja u slučaju njegove odsutnosti, spriječenosti ili prijevremenog završetka mandata, prelaze na Potpredsjednika Udruženja koji se bira na prvoj sjednici iz reda članova Upravnog Odbora Udruženja.

#### Član 27.

Predsjednik može biti smjenjen sa funkcije u skladu sa članom 12. ovog Statuta, ukoliko ne ispunjava i ne podržava osnovne ciljeve Udruženja.

Predsjednika na prijedlog 2/3 (dvije trećine) članova Upravnog odbora, smjenjuje Skupština nadpolovičnom većinom prisutnih članova Skupštine.

U slučaju da Predsjednik Udruženja prestane vršiti svoju dužnost, Skupština je dužna pokrenuti postupak izbora predsjednika Udruženja u roku od 30 dana pri čemu ga mijenja podpredsjednik Udruženja.

Sve odredbe koje važe za predsjednika važe i za podpredsjednika Udruženja u skladu sa članom 26. alineja 3.

### **IX SEKRETAR UDRUŽENJA**

#### Član 28.

Skupština imenuje sekretara udruženja, koji je po funkciji i sekretar Upravnog odbora Udruženja.

Sekretar Udruženja brine o svim administrativno-tehničkim poslovima Udruženja kao i o njenim finansijskim poslovima.

Sekretar Udruženja pomaže Predsjedniku odnosno Potpredsjedniku Udruženja u obavljanu svih poslova i ima pravo uvida u sve aktivnosti i poslove Predsjednika Udruženja, odnosno samog Udruženja.

Sekretar Udruženja bira se na period od 1 (jedne) godine sa mogućnošću 1 (jednog) reizbora.

### **X FINANSIJSKO – MATERIJALNO POSLOVANJE**

#### Član 29.

Finansijsko poslovanje Udruženja vodi se na temelju finansijskih važećih propisa.

#### Član 30.

Djelatnosti Udruženja finansiraju se:

- Donacijama, dotacijama, članarinama, poklonima i dobrovoljnim priložima;

- Namjenskim sredstvima dobivenim od državnih tijela i drugih organizacija u svrhu ostvarivanja postavljenih ciljeva;
- Iz drugih izvora u skladu sa zakonom.

#### Član 31.

Obim, namjene, raspodjele i potrebe finansijskih sredstava utvrđuju se finansijskim planom za svaku godinu, u izuzetnim prilikama tromjesečno, što se utvrđuje posebnim aktom. Skupština je obavezna jednom godišnje usvojiti finansijski izvještaj o radu 2/3 (dvotrećinskom) većinom glasova. Izvještaje priprema i u formi prijedloga dostavlja Upravni odbor.

#### Član 32.

Imovinu Udruženja čine novčana sredstva, nekretnine, oprema, inventar i arhivsko-bibliotečki fond.

#### Član 33.

Imovina Udruženja preventivno služi za ostvarivanje njegovih programskih ciljeva, te za uredno poslovanje Udruženja.

#### Član 34.

Skupština je obavezna najmanje jednom godišnje usvoji dvotrećinskom odlukom Finansijski izvještaj o radu, a koji priprema i Skupštini dostavlja Upravni odbor.

#### Član 35.

(finansijski izvještaj o radu)

Udruženje se može pripojiti, razdvojiti ili na drugi način transformirati dvotrećinskom većinom glasova prisutnih članova Skupštine.

#### Član 36.

Predsjednik Udruženja može donijeti poseban pravilnik o finansijsko-materijalnom poslovanju uz saglasnosti Upravnog odbora dvotrećinskom većinom.

### **XI JAVNOST RADA UDRUŽENJA**

#### Član 37.

Rad organa i radnih tijela Udruženja je javan.

Javnost rada se obezbjeđuje putem javnih sjednica, stalnog i blagovremenog obavještavanja javnosti preko sredstava informisanja.

Javnost rada Udruženja ostvaruje se:

- Pravovremenim i kvalitetnim izvještavanjem članova o radu Udruženja, pisanim izvještajima na posebnim skupovima, putem oglasne ploče i na druge načine;
- Putem sredstava javnog informisanja.

Radi potpunije obavještenosti javnosti i članstva Udruženja može izdavati periodična obavještenja, biltene, časopise i drugo u skladu sa zakonskim propisima.

## **XII PROMJENA STATUTA UDRUŽENJA**

### **Član 38.**

Statut, izmjene i dopune Statuta može predložiti Upravni odbor, 1/3 (jedna trećina) članova Udruženja i jedan od akcionih oblika djelovanja.

Statut, izmjene i dopune Statuta donosi Skupština na kojoj je potrebno da bude prisutna natpolovična većina članova, a Statut, onosno izmjene i dopune smatraju se usvojenim ako se za njih izjasni dvotrećinska većina prisutnih članova.

## **XIII PRESTANAK RADA UDRUŽENJA**

### **Član 39.**

Udruženje prestaje s radom prema odluci Skupštine pri čemu će se odlučiti i o imovini Udruženja te u slučajevima i na način određen zakonom.

### **Član 40.**

U slučaju da se ne održi Skupština Udruženja imovina će privremeno biti predana odnosno preuzeta od strane Fakulteta za javnu upravu u Sarajevu.

### **Član 41.**

Predsjednik ili sekretar Udruženja dužni su podnijeti prijavu o prestanku rada Udruženja nadležnom organu radi brisanja iz Registra udruženja.

## **XIV PRELAZNE I ZAVRŠNE ODREDBE**

### **Član 42.**

Za tumačenje ovog Statuta nadležna je Skupština Udruženja.

### **Član 43.**

Pitanja koja nisu pobliže uređena ovim Statutom mogu se urediti drugim propisima Udruženja

### **Član 44.**

Ovaj Statut stupa na snagu danom njegova usvajanja na Skupštini Udruženja.

U Sarajevu, 11.04.2011 godine

PREDSJEDNIK SKUPŠTINE ASFJU

---